



Informativni bitlen Općine Vareš

OBNOVLJENA Osnovna škola Vareš



Učenici otišli u Švedsku



Nastavak radova na putu R-444



Mladi volonteri



OBNOVLJENA OSNOVNA ŠKOLA „VREŠ“

Završena je rekonstrukcija Osnovne škole „Vreš“ u Vrešu. Preko Američke ambasade su obezbijeđena sredstava u iznosu od 323.000 eura. Radovi su izvedeni preko ljetnog raspusta a izvođač radova je firma Jelen d.o.o. Brčko.



ADAPTACIJA PODRUČNE ŠKOLE U DABRAVINAMA

U toku ljeta izvršena je rekonstrukcija dijela zgrade Područne škole u Dabrinama. Sredstvima Federalnog ministarstva obrazovanja (45.000 KM) uspješno je realizirana I faza rekonstrukcije (izmjena krova, uređenje podova, izmjena svih vrata na učionicama i zamjena otvora na prednjim i bočnim dijelovima zgrade i postavljanje fasade na prednjem dijelu zgrade).

Ovim projektom je predviđena i adaptacija sanitarnih čvorova, izmjena otvora na zadnjem dijelu zgrade i uvođenje centralnog grijanja, za što je neophodno obezbijediti 90.000 KM. Ovu Područnu školu pohađa 98 učenika, a ova faza rekonstrukcije će učenicima i njihovim nastavnicima omogućiti bolje uslove za rad.

PONOVO U ŠKOLSKIM KLUPAMA

U ponedjeljak 07.septembra školsko zvono označilo je početak nastave u OŠ Vreš i OŠ Vreš majdan i MSŠ "Nordbat 2" Vreš.

Osnovnu školu pohađa ukupno 799 učenika,

- OŠ Vreš 470 učenika,
- OŠ Vreš Majdan 329 učenika.

U prve razrede upisano je 72 učenika.

MSŠ "Nordbat 2" Vreš će u školskoj 2009/2010 pohađati ukupno 278 učenika, u prve razrede upisani su 4 odjeljenja (gimnazija, ekonomska tehnička škola,

PTT tehničar i saobraćajna stručna škola-vozač motornih vozila), a škola ima ukupno 13 odjeljenja. Svim učenicima, nastavnicima i profesorima želimo puno uspjeha i dobre rezultate u savladavanju i usvajanju novih znanja i vještina u školskoj 2009/2010 godini.



NOVI ZAKONI I NOVINE U ZAKONU

Od početka 2009. godine obavljani su zakoni iz oblasti obrta, ugostiteljstva i turizma:

-Novi Zakon o obrtu je objavljen u "Sl. novine FBiH", br. 35/09 od 22.05.2009. godine. Najbitnije u istom je to da po članu 9. stav 2. fizičko lice može obavljati obrt kao dopunsko ili dodatno zanimanje, ako ima već zasnovan radni odnos po bilo kom osnovu ili je korisnik penzije

-Novi Zakon o ugostiteljskoj djelatnosti objavljen je u "Sl. novine FBiH", br. 32/09, od 11.05.2009. godine, po kome ugostiteljsku djelatnost može obavljati fizičko lice ako nema zasnovan radni odnos, tj. da ne može ugostiteljstvo biti dopunska djelatnost. Oni kojima je to do sada bila dopunska djelatnost dužni su usaglasiti svoje poslovanje sa odredbama ovog zakona u roku od jedne godine od dana stupanja na snagu ovog Zakona (maj 2010 god.)

-Novi Zakon o turističkoj djelatnosti objavljen je u "Sl. novine FBiH", br. 32/09, od 11.05.2009. godine.

REAKCIJA GRAĐANA

U prostorijama načelnika općine je dana 07.09.2009. godine održan sastanak sa čelnim ljudima iz ŠPD Zavidovići i Šumarije Vareš, kao i predstavnicima MZ Vareš-Majdan u vezi zaustavljanja radova na sječi, izradi i izvlačenju stabala iz Odjela 8 GJ Gornja Stavnja, iznad naselja Vareš-Majdan. Pošto postoji bojazan da usljed sječe stabala na tom lokalitetu može doći do smanjenja kapaciteta vode i erozije tla, na sastanku su doneseni sljedeći zaključci: da se sječa stabala prolongira do maja mjeseca naredne godine, da se za OV pripreme prijedlozi Odluka o zaštitnim zonama i da se pozovu federalni šumarski i vodoprivredni inspektori kako bi uviđom na terenu dali svoje mišljenje.

BRŽA I KVALITETNIJA USLUGA

Izgradnja centra za pružanje usluga građanima (šalter sala) u Općini Vareš.

Između Općine Vareš i firme Beta-company iz Kaknja je potpisan ugovor 02.09.2009. godine o Izgradnja centra za pružanje usluga građanima (šalter sala) u Općini Vareš. Vrijednost ugovora je 155.833,65 KM. Izgradnja šalter sale se vrši u sklopu realizacije GAP projekta. Rok za izvođenje radova je 45 dana.

REGISTRACIJA POLJOPRIVREDNIH GAZDINSTAVA

U oblasti poljoprivrede najznačajniji projekat je Registracija poljoprivrednih gazdinstava, ovaj proces se odvija na prostoru cijele FBiH. Sama registracija predstavlja dio procesa reforme poljoprivredne proizvodnje koje su neophodne da bi BiH stekla status zemlje kandidata za ulazak u EU.

Samo će registrovani poljoprivredni proizvođači moći podnositi zahtjeve za ostvarivanje novčanih poticaja federalnih, kantonalnih i općinskih i podositi prijave na javne pozive koji za cilj imaju podršku i pomoć u razvoju poljoprivrede.

Proces registracije je besplatan i svi zainteresovani ga mogu izvršiti svakim radnim danom u nadležnoj općinskoj službi.

Do sada je registrovano dvadeset poljoprivrednih proizvođača.

ASFALT U ZUKIĆIMA

Realizovan je projekat rekonstrukcije ulice Zukići koje je finansiralo kantonalno Ministarstvo prometa i komunikacija a izvođač radova bila je firma Euro-asfalt Sarajevo.

MALI BIZNIS

Na području općine Vareš ima registrirano 41 privatno poduzeće, 55 samostalnih trgovinskih radnji, 32 ugostiteljska objekta, 37 samostalnih zanatsko uslužnih radnji, 7 videoteke i zabavni klubovi, 4 osiguravajuće kuće, 3 igre na sreću i sportske kladionice, 2 mikrokreditne organizacije, 11 autoprijevoznika, 5 taksi prijevoznika, 1 auto škola.

Izdato je oko 40 rješenja za obavljanje poljoprivredne djelatnosti i oko 50 rješenja za obavljanje prijevoza za vlastite potrebe.

Trenutno je u procesu registracije 1 zanatsko-uslužna radnja sa predmetom poslovanja proizvodnja i prodaja stolarije, namještaja kao i krovopokrivačke usluge.

POKRETANJE BIZNISA ZA 24 SATA

Općina Vareš je jedna od 3 općine u BiH koja izdaje rješenja o odobrenju obavljanja bilo koje djelatnosti za samo 1 dan.

Ovaj postupak od aprila mjeseca ove godine provodi općinska Služba za privredu i finansije uz pomoć organizacije USAID SPIRA. Efikasno je smanjena "papirologija" i troškovi stranaka.



NOVI MOST NA R-444a

Završena je rekonstrukcija mosta na regionalnom putu Vareš-Kraljeva Sutjeska na lokalitetu Ponijeri koji je bio oštećen.

Prilikom rekonstrukcije mosta saobraćaj na potezu Pogar-Luke je bio u potpunosti obostavljen te se koristio alternativni pravac Pogar-Donja Borovica-Luke. Most je ponovo stavljen u funkciju 07.09.2009. godine.

Izvođač radova je JKP Vareš a finansijer kantonalno Ministarstvo prometa i komunikacija.

POSJETA KOMUNI FLEN U ŠVEDSKOJ

U okviru Projekta "Partnerstva općine Vareš i komune Flen u Švedskoj" - saradnja između škola, kroz uzajamne posjete učenika MSŠ "Nordbat 2" i Gimnazije "Princ Wilhelm" iz Flena u vremenu od 10 – 17.septembra organizovan je odlazak predstavnika naše škole (tri učenika i profesor engleskog jezika) u Flen.

Naši učenici su u vrijeme boravka prisustvovali redovnoj nastavi u Gimnaziji „Princ Wilhelm“ a slobodno vrijeme su provodili sa svojim vršnjacima iz Flena.

Mladi rock bend "Leisie River" je svojim nastupima oduševio domaćine i flensku publiku i imali su priliku uraditi demo materijale četiri pjesme a njihov nastup je zabilježen i kamerom i tri video klipa su postavljena na You tube. Urađen je i promotivni materijal.

Troškove boravka i puta snosila je kao i do sada komuna Flen.



MLADI VOLONTERI

Već četvrtu godinu u toku ljeta u Varešu se održavaju interkulturalne kreativne sedmice. Projekat vodi "Narko-NE" Sarajevo Udruženje za prevenciju ovisnosti, a partneri u projektu su "LOS" Udruženje mladih iz Vareša, MSŠ "Nordbat 2" Vareš i općina Vareš.

U projektu je učestvovalo 5 studenata pedagoške i likovne akademije iz Švicarske i 20 učenika MSŠ "Nordbat 2" Vareš. Odabrane su projektne aktivnosti obnova gradske fontane i

uređenje parka, izmjene klupa, postavljanje šahovskog polja i izrada figura za šah na platou ispred spomenika Rešad Saletović u Varešu i kreativne radionice sa učenicima osnovnih škola.

U vrijeme realizacije projekta organizovana je zajednička posjeta kraljevskom gradu "Bobovac" sa mladima iz Viteza gdje se realizira isti projekat. Organizovano je zajedničko druženje Varešana i mladih volontera iz Viteza i priređen je završni party za sve učesnike i goste u kino sali "Zvijezda" u Varešu.





KOMUNALNO RADJEVINSKA INSPEKCIJA

S obzirom na predstojeći zimski period iz ove inspekcije podsjećaju građane na obavezu organizovanja čišćenja snijega i leda. Naime, prema članu 87. Odluke o komunalnom redu Općine Vareš:

- za uklanjanje snijega i leda ispred poslovnih prostorija i sa krovova poslovnih prostorija odgovorna je pravna ili fizička osoba koja je vlasnik ili korisnik tog poslovnog prostora,
- za uklanjanje snijega i leda ispred stambenih zgrada i sa krovova stambenih zgrada odgovorni su vlasnici ili korisnici stanova u njima,
- za uklanjanje snijega i leda sa trotoara uz kioske i pokretne uređaje odgovorni su vlasnici odnosno korisnici istih,
- za uklanjanje snijega i leda sa taxi stajališta odgovorni su taxi prevoznici,
- snijeg i led sa javnih saobraćajnih površina, trotoara i javnih stajališta uklanja JKP Vareš.

Takođe, podsjećamo da je zabranjeno

iznosenje i gomilanje snijega iz dvorišta, bašta i drugih slobodnih površina na ulice i trotoare, te bacanje snijega ispred stambenih i poslovnih prostorija na saobraćajnicu.

Još jednom podsjećamo građane koji imaju istrošene madrace, stari namještaj i bijelu tehniku ili kakav drugi krupni otpad da mogu od ponedjeljka do petka pozivom na broj 843 033 iz JKP Vareš dobiti informacije o terminu odvoza krupnog otpada kako nebi bespotrebno iznosili stvari i po nekoliko dana unaprijed i na taj način stvarali ovako ružne slike. Takođe, u komunalnoj inspekciji ističu da su za nepoštivanje ove obaveze predviđene kaznene odredbe prema članu 106. Odluke o komunalnom redu i to 250 do 2 500 KM za pravna lica i 20 do 200 KM za građane.



UPRAVLJANJE I KORIŠTENJE PITKE VODE

Zakon o vodama Zeničko-dobojskog kantona daje mogućnost vlasnicima vodnih objekata koji služe za snabdjevanje vode za piće, da putem saglasnosti predaju na upravljanje vodovode i vodne objekte preduzeću koje je registrovano za obavljanje ove djelatnosti.

Na području općine je ovaj proces već započeo u mjesnim zajednicama: Pržići, Kokošćići, Budoželje i Dabravine u kojima su vodovodi predati na upravljanje i korištenje pitke vode JKP "Vareš".

Ono što je najbitnije, značajno se podiže nivo nadzora i ispravnosti vode što podiže i nivo zdravstvene zaštite stanovništva.

Redovno snabdijevanje stanovništva pitkom vodom, održavanje samih vodnih objekata kao i mreže, postaje osnovna obaveza preduzeća koje upravlja vodovodom.

KONAČNO ASFALT

Rekonstrukcija (asfaltiranje) puta Ravne-Crna Rijeka.

Od ukupno 3.460 metara dužine ova puta urađena je rekonstrukcija (asfaltiranje) 1.985 metara puta u koji je uloženo oko 305.000 KM.

Ova sredstva su obezbijedena od strane Sarajevskog kantona (125.000 KM) i Fonda za povratak BiH (180.000 KM).

Izvođač radova je konzorcij HS-putevi Tešanj i Zvornikputevi Zvornik.

Radovi na ovoj dionici su završeni 25.08.2009. godine.

Nastavak radova se očekuje kada se obezbijede potrebna sredstva.



OBNOVA RADNIČKOG DOMA

Preko Fondacije za održivi razvoj urađena je i druga faza Rekonstrukcije Radničkog doma.

Radovi su završeni 21.08.2009. godine i obuhvatili su fasaderske radove, zanatske radove, dio elektro instalacija i vodovod i kanalizaciju. Vrijednost ugovorenih radova je 275.150,08 KM od čega je Fondacija učestvovala sa 200.000 KM a Općina sa 75.150,08 KM.

Učešće Općine je obezbijedeno preko donatorskih sredstava od Vlade Republike Hrvatske. Izvođač radova je firma Stil-gradnja iz Zavidovića.



ODLUKA O ANKETI

Na osnovu člana ___ Statuta Općine Vares broj: 01-25/09 od 29.01.2009. godine, Općinsko vijeće Vares na ___ sjednici, održanoj dana ___ 2009. godine d o n o s i

O D L U K U

o anketi kao sredstvu za utvrđivanje prioriteta u mjesnim zajednicama i kriterijima za određivanje prioriteta

Član 1.

U cilju uključivanja većeg broja građana u proces planiranja budžeta određuje se Anketa kao sredstvo za određivanje prioriteta u mjesnim zajednicama.

Član 2.

Anketa treba da obuhvati najmanje 20% od broja domaćinstava u svakoj mjesnoj zajednici, a mora biti završena najmanje mjesec dana prije kreiranja prvog nacrt budžeta za narednu godinu. Rezultati ankete uzeće se u obzir pri raspodjeli sredstava i kreiranju Nacrta budžeta, rukovodeći se kriterijima za odabir prioriteta.

Član 3.

Za organizovanje i provođenje Ankete zadužuje se Općinski načelnik i nadležna općinska Služba, uz saradnju sa organima mjesnih zajednica i/ili Udruženja građana.

Član 4.

Sastavni dio ove Odluke su i Kriteriji, kojim se sumiraju rezultati anketa u MZ i isti služe za utvrđivanje liste prioriteta u mjesnim zajednicama.

Član 5.

Zadužuje se Općinski načelnik i nadležna općinska Služba da nakon dobijenih rezultata anketiranja informišu Općinsko vijeće.

Član 6.

Ova Odluka stupa na snagu danom donošenja i bit će objavljena na oglasnoj tabli općine Vares.

ODLUKA O JAVNIM RASPRAVAMA

Na osnovu člana ___ Statuta općine Vares broj: 01-25/09 od 29.01.2009. godine, Općinsko vijeće Vares na ___ sjednici, održanoj dana ___ 2009. godine d o n o s i

O D L U K U

o javnim raspravama u općini Vares

Član 1.

Ovom odlukom se reguliše javna rasprava kao instrument učešća građana u odlučivanju, i pitanja iz opće nadležnosti za koja je neophodno organizovati javnu raspravu.

Član 2.

Javna rasprava u općini Vares obavezno će se organizovati u slijedećim slučajevima:

- Neposredno po usvajanju Nacrta budžeta općine za narednu godinu – o Nacrtu budžeta za narednu godinu;
- Prilikom izrade novog ili promjene postojećeg Prostornog plana općine, dijela općine ili naseljenog mjesta - o Prostornom planu ili njegovim željenim promjenama;
- Prilikom planiranja i projektovanja kapitalnih investicija u općini Vares – o planiranim investicijama;
- Prije potpisivanja kapitalnih ugovora općine Vares sa trećim licima koji će rezultirati velikim zaduženjima ili značajnim projektima na području općine;
- Pri donošenju odluka koje se direktno odnose na jednu kategoriju ili grupu građana (mladi, umirovljenici, poljoprivrednici...) i imaju utjecaj na promjenu njihovih životnih uvjeta – o odlukama koje će se donijeti;
- Prilikom promjene visine poreskih stopa ili taksi koje joj pripadaju i reguliše ih općina, a naplaćuje od građana – o visini poreskih stopa i iznosu taksi;

- U ostalim slučajevima za koje općinska tijela ocijene da bi bila korisna.

Član 3.

(1) Javnu raspravu organizira Služba nadležna za oblast koja je tema diskusije na javnoj raspravi u saradnji sa savjetima mjesnih zajednica ili predstavnicima određenih kategorija građana.

(2) Za provođenje javne rasprave organizatori će koristiti zborove građana, medije (otvorene emisije), skupštine udruženja, okrugle stolove, fokus grupe i ostale oblike okupljanja i komuniciranja koje ocijene potrebnim i primjerenim za datu temu.

Član 4.

(1) Javna rasprava se organizuje na prostoru cijele općine, ako se radi o pitanju svih građana općine, odnosno na samo jednom dijelu ili među jednom kategorijom građana, ako je riječ o pitanju od interesa za građane jednog dijela općine ili jedne kategorije građana.

(2) Javne rasprave o Nacrtu budžeta za narednu godinu organizuju se u mjesnim zajednicama općine Vares.

Član 5.

Javna rasprava traje najmanje 15 dana, od dana pozivanja građana da se uključe u javnu raspravu.

Član 6.

(1) Pravo učešća na javnoj raspravi imaju svi građani sa pravom glasa, odnosno svi predstavnici populacije na koju se odnosi pitanje o kojem se vodi javna rasprava.

(2) Organizator treba osigurati da među učesnicima javne rasprave budu zastupljeni predstavnici svih kategorija građana (penzioneri, mladi, žene...), ili da vodi računa o polu, nacionalnoj i starosnoj strukturi ako se raspravlja o temi koja se tiče samo jedne kategorije građana.



Član 7.

(1) Javna rasprava se organizuje u vrijeme i na mjestu koje odgovara većini potencijalnih sudionika.

(2) Obaveza organizatora je da preduzme sve potrebne aktivnosti koja će osigurati prisustvo i učešće građana u javnoj raspravi (plakativiranje obavijesti, najavom u lokalnim medijima, ciljanim slanjem nacrtu dokumenata koji su predmet javnih rasprava najmanje 7 dana prije javne rasprave i na drugi prigodan način).

(3) Javne rasprave o Nacrtu budžeta za narednu godinu i ostalim temama koje se organiziraju u mjesnim zajednicama održaće se putem zborova građana, a sudionici su predstavnici općinskih vlasti, članovi Savjeta mjesnih zajednice i građani.

Član 8.

(1) Zaključci sa javnih rasprava moraju biti sumirani, uvaženi kod odlučivanja o predmetu i predstavljati građanima.

(2) Zaključci sa javnih rasprava o Nacrtu budžeta za narednu godinu dostavljaju se Službi za privredu i finansije, odnosno Načelniku općine, te će biti korišteni u izradi prijedloga ovih dokumenata.

(3) O javnim raspravama i prihvaćenim zaključcima organizator će sačiniti izvještaj i prezentovati ga Općinskom vijeću i javnosti te dostaviti učesnicima u javnim raspravama – prema evidenciji učešća.

Član 9.

Ova Odluka stupa na snagu danom donošenja i bit će objavljena na oglasnoj tabli općine Vareš.

ODLUKA O VIJEĆNIČKOM SATU I INFO LETKU

Na osnovu člana ___ Statuta općine Vareš broj: 01-25/09 od 29.01.2009. godine, Općinsko vijeće Vareš na ___ sjednici, održanoj dana ___ 2009. godine d o n o s i

O D L U K U

o transparentnosti rada Općinskog vijeća

Član 1.

Ovom odlukom uvodi se „Vijećnički sat“ i štampanje Info letka, kao načina unaprjeđenja transparentnosti rada Općinskog vijeća Vareš, u cilju efikasnije komunikacije između izabranih predstavnika i građana i informisanja građana.

Član 2.

„Vijećnički sat“ će građanima omogućiti da kroz neposredan razgovor sa izabranim predstavnicima dobiju odgovore na postavljena pitanja ili da kroz formu vijećničkih pitanja dođu do odgovora na postavljena pitanja od strane nadležnih organa općine Vareš.

Član 3.

Ovom odlukom obavezuju se vijećnici Općinskog vijeća Vareš da u skladu sa Planom održavanja vijećničkih sati, utvrđenom od strane Stručne službe Općinskog vijeća, ostvaraju komunikaciju sa građanima u općini Vareš.

Član 4.

Stručna služba Općinskog vijeća se obavezuje se da o Planu održavanja vijećničkih sati, metodologije rada i efektima primjene ove Odluke informiše Općinsko vijeće najmanje jednom godišnje.

Član 5.

Obavezuje se Služba za društvene djelatnosti i BIZ-u da nakon usvojenog Plana održavanja vijećničkih sati obavijesti javnost o istom, i to putem elektronskih i pisanih medija, mjesnih zajednica, kao i putem Info pulta i web stranice općine.

Član 6.

O bitnim odlukama i stavovima u vezi sa pitanjima o kojima je raspravljalo, Općinsko vijeće Vareš će nakon svake

sjednice štampati Info letak. Obradu podataka i tehničku pripremu za štampanje Info letka obavlja Stručna služba Općinskog vijeća..

Član 7.

Info letak će biti odštampan u roku od 10 dana od dana održavanja sjednice Općinskog vijeća. Distribuciju Info letka obavlja Služba za opću upravu u roku od 5 dana od dana prijema istih od strane Stručne službe Općinskog vijeća. Sadržaj Info letaka publikuje se posredstvom web stranice općine, a odštampani primjerci se dostavljaju na Info pult opštine, mjesnim zajednicama koje će vršiti dalju distribuciju građanima na području općine, kao i na druga mesta, utvrđena Planom distribucije..

Član 8.

Ova Odluka stupa na snagu danom donošenja i bit će objavljena na oglasnoj tabli općine Vareš.